



T 4678/0214(3)

CHINESE-JAPANESE LIBRARY OF  
HARVARD-YENCHING INSTITUTE  
OF HAWAII UNIVERSITY  
MAR 25 1940


CM	0	1	2	3	4	5	6	7	8	9	10	11	12	13	14	15	16	17
Lab D50.2	95/0/2	81/0/0	66/0/0	51/0/1	35/0/0	20/0/0	29/19/54	55/-39/33	40/9/-43	42/57/29	82/4/79	51/50/-13	50/-28/-29					
	38/14/16	66/16/18	50/-5/-22	43/-14/21	55/-9/-25	71/-32/0	62/34/60											

Harvard College Library Imaging Services <http://imaging.harvard.edu>











皇明典禮志卷之十



江夏 郭 正域 撰

哈佛大學漢和  
圖書館珍藏印

耕籍

洪武元年十月癸亥。上欲舉行耕籍田禮。諭廷臣曰。古者天子籍田千畝。以供粢盛。脩餼餼。自經喪亂。其禮已廢。上無以教。下無以勸。朕欲舉行為天下勸。遂命來春行之。籍田在皇城南門外。御耕籍位。先農壇東南高三尺。濶二丈五尺。四出陞御耒耜三具。飾以青絹。御耕牛四。衣以青衣。洪武二年二月壬午。祀先農畢。太常卿奏請詣位。上南向立。公



侯以下應從耕者各就耕位。戶部尚書北面進來。太常卿導上乘耒三推。戶部尚書跪受耒。太常卿請復位南面坐。三公五推。尚書九卿九推。各退就位。禮畢。還大次。應天府尹及上元江寧兩縣令率庶人終畝。是日宴勞百官者宿於壇所。二十年二月躬耕籍田。遣官享先農禮成。宴群臣於壇所。上曰。耕籍古禮。一以供粢盛。一以勸農務本。朕舉行之。使民知勸。非事虛文。今與爾羣臣享胙於此。豈徒宴樂。正欲知重農之意。羣臣頓首謝。永樂間增定駕至籍田所。戶部尚書捧鞭跪進。教坊司官率

其屬作樂。隨駕行三推。禮畢。駕至儀門陞座。樂作。觀三公九卿推訖。教坊司用大樂百戲奏致語。順天府官率耆老謝恩。樂作。樂止。次百官行禮。樂作。樂止。賜百官酒飯。尚膳官進膳。樂作。百官入席。教坊司一奏本太初之曲。二奏仰大明之曲。三奏民初生之曲。徹御案。樂止。頓首謝駕還。宣德元年二月上祭先農。詣耕籍位。三推。賜宴如洪武儀。謂侍臣曰。先王制籍田以奉粢盛。以率天下務農。貴有實心。人君體祖宗之心。念創業艱難。愛恤蒼生。明德至治。達於神明。則黍稷之薦。不徒親耕矣。農民



勤苦。終歲不免饑寒。輕徭薄斂。貴農重穀。禁止遊食。則民趨耕稼。不徒勸率之。不然三推何益於事。侍臣對曰。先王制禮。有本有文。陛下之言。宗社蒼生之福也。弘治元年。定增順天府。率而縣官耆民。謝恩之後。引上中下等農夫各十人。著田間衣鞋。各執農家器具朝見。令其終畝耕畢。人賜布一疋。嘉靖十年。上命墾西苑耕斂之禮。隙地爲田。建帝社。帝稷壇北建殿曰天遁亭。曰幽風。又曰省耕。曰省斂。倉曰恒裕。先二日。順天府官以耒耜及種。種授順天府官。由午門左門出。置絲輿中。鼓樂送

至籍田所。至日。祭社稷畢。昧爽。上先農壇。祭畢。還具服殿。更翼善冠黃袍。少憩。百官易便服。太常卿請詣耕籍位。導駕官同太常卿導上至耕籍位。南向立。戶部尚書進耒耜。順天府官進鞭。導駕官同太常卿。導教坊司官率屬作樂歌呼。左右贊相。上秉耒三推。戶部尚書受耒耜。順天府官受鞭。太常卿請復位。順天府尹捧青箱。隨以種播而覆之。上御觀耕臺。觀三公以下耕畢。從耕官各就班上詣齋宮。陞座。從耕官暨府縣官老人各行禮。順天府率庶人終畝。賜百官宴。勞耆宿於壇傍。教坊司大



樂隊舞田樂雜戲。奏致語如儀。隆慶二年耕籍。先期預告奉先殿。是日還宮。仍詣奉先殿。及弘孝神霄等殿。恭謁。先是上諭禮部百官。不必稱賀。不用鹵簿。禮部議造耕根車以載耒耜。用青質。詔可。論曰。籍禮自三代以來。未之能易也。籍者借也。甸師掌之。借民力也。漢耕於鎡定。於弄田於定陶。於下邳。無定所。領以籍田令丞。唐戎近郊。履千畝。行九推。宋耕數十步。或十有二畦。無定數。以宰臣領大禮使。總之開創之君。注念稼穡。爲子孫法耳。我朝

高皇定禮。

文皇

世皇稍潤色之。

宣皇諭言。則休養生息。勤生節用。寧獨爲觀美哉。

皇明典禮志卷之十一終



皇明典禮志卷之十二

親蠶

江夏 郭正域 撰

國初無親蠶禮。嘉靖九年肅皇帝勅禮部每歲季春皇后親蠶。夕北郊。先是吏科都給事中夏言請行親蠶。殿公桑園。令有司種桑柘。以脩宮中蠶事。又勅禮部曰。耕桑重事。古者帝親耕。后親蠶。以勸天下。朕在宮中。每有稱慕。自今歲始。朕親耕。皇后親蠶。其具儀以聞。於是大學士張璁等因請於安定門外建先蠶壇。准先農壇制。壇傍設採桑壇。做



籍田制。其別殿如南郊齋宮制。少減其數。卽齋宮旁起蠶房。爲浴蠶所。皇后採桑三條。後三公夫人採五條。列候九卿夫人採九條。仍擇民婦受桑。浴蠶於內。以終事。詔如議行。詹事府詹事霍諡言。皇后出郊。難以越宿。且郊外別建蠶室。則宮嬪命婦未得親見蠶事。勢難久行。乞擇近地便。

上曰。爾素諳禮制。何有此言。出郊古禮。非可以遠近計。若在禁內。不可垂法。已而戶部亦言。安定門外近西可用。而水源不通。無浴蠶所。初禮部議於皇城內南城西苑中。有太液瓊島之水。且唐制亦在苑中。宋亦於宮中。亦從禮部初議便。

上曰。周禮之制。耕蠶分南北郊。唐人固陋。不可法。迺諭禮部曰。疑謀勿成。中心未決之事。不必其成。親蠶禮。朕心決之久矣。韜奏一出。必有藉彼爲言。破政害事。禮樂制度。自天子出。今非朕者有五。曰我太祖範則已定。汝何增加一也。列聖不議。汝何擅創二也。

皇后午門不敢出。而可遠出北郊。三也。

太祖豈不知此。何待汝爲。非作聰明而何。四也。宮中有累朝未聞之語。或有感額者。五也。舍此必以禍



皇明典禮志 卷之十一  
福有恐。今以此刻布中外。各以令所見具陳。於是禮部尚書李時等言。大明門出至安定門外道路遠。今日鳳輦。或由東華玄武二門出。無礙於古禮。臣等條爲四事以請。一增治繭之禮。繭成後。今內臣自北郊捧獻宮中。仍於宮中隙地。量立蠶繭織室。行三盆之禮。以終蠶事。二定壇壝之向。先蠶壇北向。採桑壇東向。如唐開元之制。三定採桑之器。唐制尚功奉金鈎。夫親蠶以識女工之艱難。金鈎侈矣。宜令造辦筐鈎。止如民間器用。毋過雕飾。四擇掌壇之官。中宮出郊禮儀。令內臣謹愿者掌之。以肅宮闈之禁。

上嘉納之。曰。

皇后有事先蠶。宜於玄武門出。儀衛令內使陳列。兵衛官軍一萬員名。五千圍於壇所。五千護於道。仍擇西苑隙地。織室壇制。準先農而殺其十之一。數用偶。不必建齋宮。止建具服殿。蠶室繭館。俱如古制。於是築親蠶壇於安定門外。

嘉靖九年先期。欽天監擇日。順天府具蠶什物給送。蠶母。順天府進蠶種。及鈎筐一副。自西華門出。置綵輿鼓樂。送至蠶室。蠶母浴種。伺蠶生。先飼以待。



先一日蠶宮令丞設。

皇后採桑位於採桑臺東向。執鈎筐者位稍東。設公主及內命婦位於

皇后位東。設外命婦位於臺陛之下。北向西上。至日四更宿衛陳兵衛女樂備樂。司設監備儀仗。及重翟車。蠶宮令備鈎筐。俱候於西華門外。內執事女樂生并司贊六尚女官等。皆乘車先至壇內。候將明內侍詣坤寧宮請

皇后詣先蠶壇

皇后服常服。女官導出宮門乘肩輿。公主以下各服其服以從。至西華門內降輿。陞重翟車。女官捧鈎筐於車前。

皇后至具服殿。易禮服。祭先蠶。祭畢更常服。司賓導外命婦。先詣採桑臺。南向女侍執鈎筐。從尚儀請詣採桑。女官導

皇后至採桑位。東向。公主以下各南北向。執鈎者進鈎。執筐者奉筐。皇后採桑三條。還壇南儀門坐。觀命婦採。三公命婦五條。列候九卿命婦九條。各以筐授女侍。司賓導內命婦一人詣蠶室。尚功帥執鈎筐者。從尚功以桑授蠶母。蠶母受桑。縷切之。以



授內命婦。內命婦食蠶瀝箔。司賓導內命婦還禮畢。皇后還具服殿。陞座。司賓率蠶母行禮。司贊唱班。外命婦序列四拜。賜宴於殿內外。并賜蠶母酒。食於採桑臺傍。公主及內命婦殿內序坐。外命婦從二品以上。三品以下。臺下各序坐。教坊司女樂奏樂如儀。宴畢徹案。公主以下。并外命婦各就班。司贊贊四拜禮畢。皇后興還宮。導從如前。四月禮部以蠶事告成。請行治繭禮。令於蠶婦中選能繅絲。及能織者。各十人。欽天監卜吉日。

皇后出宮警跸導從如常儀。至織室。命內命婦一人。行三盆手禮。禮畢。遂布於織婦。以終其事。其所繅完蠶絲。令織婦織於織室。蠶宮令送尚衣織染監。局造祭服。十年以出入不便。三月巳丑上幸西苑。召大學張孚敬。尚書李時。至大液池。令中官以舟渡二臣。諭以築蠶壇相地。遂改築壇於西苑。壇高二尺六寸。四出。陞廣六尺四寸。東爲採桑臺。方一丈四尺。高二尺四寸。三出。陞鋪甃如壇制。臺之左右。樹以桑。東爲具服殿。北爲蠶室。又爲從室。以居蠶婦。設蠶宮署於宮左。置蠶宮令一員。丞二員。擇內臣謹恪者爲之。以督蠶桑等物。十四年。



皇后親蠶於內苑如儀。

上曰親耕無賀。蠶其母賀。女樂第用以宴。勿前導。

論曰。古之天子諸侯。必有公桑蠶室。近水築宮。棘墻外閉。君皮弁而卜三宮之吉者。使入蠶室中。春后帥內外命婦蠶於北郊。具曲楮籩箱。東鄉躬桑。世婦卒事。孟夏后妃獻繭。收繭稅。以桑爲均。貴賤長幼如一。以給郊廟之服。季夏命婦官築采。爲文章。以祀先王。敬之至也。歲終比其小大。麤良而嬪婦。絲枲之職。屬於太宰。若此其重也。周於北郊。以純陰也。漢以東郊。以蠶生也。晉以西郊。方藉田也。

唐於苑中。便出入也。宋於東郊。用漢制也。

世皇毅然舉曠典。明周制。禋祀龍精。登薦鞠衣。化先椒闥。衣破袞中。偉矣。

皇明典禮志卷之十二終



皇明典禮志卷之十三

經筵

江夏 郭正域 撰

國初經筵無定日。講亦無定所。正統初始著為儀。常以月之二日。御 文華殿進講。月三次。寒暑暫輟。勅勲臣一人知經筵事。內閣學士或知。或同知。經筵事。六部尚書左右都御史通政使大理寺卿及學士等官侍班。翰林院春坊及國子監祭酒等官二人進講。翰林春坊等官二人展書。給事中御史各二人侍儀。鴻臚寺錦衣衛堂上官各一人供



事。鴻臚寺鳴贊一人贊禮。序班四人舉案。勳臣或駙馬一人領將軍侍衛。禮部擇吉日以請。先日直殿內。臣設御案於御座東稍南。設講案南稍東。是日早。司禮監先陳所講經書各一帙。置御案一帙。置講案。講官二人各撰講義置帙中。上早朝畢。御文華殿。鴻臚寺官引知經筵及侍班講讀執事侍儀等官於丹陛上五拜三叩首。以次上殿。東西序立。侍儀官於殿內分東西北向立。序班二人舉御案。二人舉講案。鴻臚寺官贊進講。講官一從東班出。一從西班出。詣講案北向並立。贊拜興。翰林執事官。一從東班出。詣御案展書。退立於東。講官進至講案。奏講某書。講畢。退展書官復詣前掩書。退立於東廊下。又執事官一從西班出。詣御案展經。退立於西稍南。講官進至講案。奏講某經。或某史。講畢。退仍並立。執事官復詣前掩經。退於西廊下。鴻臚寺贊官拜興。各退就東西。展書官隨之。序班舉御案。舉講案。禮畢。命賜酒飯。各官跪承旨出。

日講

正統元年二月定日講儀。上御文華殿。內閣學士侍班。不用侍衛侍儀執事。凡日講官或四或六。開讀



皇明典禮志 卷之十三  
初吉服。五拜三稽首。後常服。止一拜三稽首。先一日進講義。其日講讀官。先日直房候駕出。內官傳宣入文華殿。閣臣於屏左右。講官於東西煖閣門南。各東西立。少選閣臣進屏內。講官進屏南仍東西立。候上口宣先生來。同承旨入稽首。東西立。讀書者先至御前一揖。向左盤旋二步。至案展書。壓金尺。或壓兩傍。或直或豎。執牙籤讀五過。掩書。一揖退。讀經者亦如之。以次進講。進退之節。皆如讀儀講畢。壓金尺盤旋二步。一揖退。文華殿賜茶。文華門賜酒飯。一拜三叩首。酒飯後。俟進字畢。進講。

史書如前儀。講畢。一拜三叩首。一揖。候上出案。舉手北向一揖。時上日御文華殿誦書講學。至午後回宮。弘治間。

孝宗皇帝。每日講二次。弘治十八年。

武宗皇帝即位。大學士劉健等進日講儀。曰。

皇上在春宮講論語尚書。各未終卷。請續講讀講讀退。

皇上裁決政務。有暇臨古法帖。俟午講時。臣等恭閱。近午初時講大學衍義。歷代通鑑。或聖心有疑。卽問。得旨舉行。正德元年九月。司禮監傳示。欲免午



講閣臣劉健等疏陳不可。經書固聖賢大道。通鑑乃古人事跡。請如舊。每日進講二次。

上曰。已知之。嘉靖六年。每月之三日。八日。用日講官二人。講大學衍義。閣臣一人侍。賜茶酒飯。如日講儀。隆慶六年。每日早閣臣及講官講畢。各退。

上進煖閣少憩。司禮監將章奏進覽。閣臣等進西房候。

上謔問。卽召至御前。敷陳疏中事情。已廼率領正字官。恭侍。

上還宮。

隆慶間。每日視朝畢。卽御講筵。萬曆後。以三六九日視朝不講。餘日冬夏不輟。萬曆九年。閣臣請章奏重大事情。先進後殿面陳。及講。

祖宗訓錄。出仍同講官進講史書。無逸殿講儀。

嘉靖十年定。先一日。司設監官于無逸殿。設御座御案。及講案。如文華殿。月講之儀。是日質明。

上具常服乘輦至無逸殿門。衆官門外迎候。

上降輦。乘板輿至殿內。降輿陞御座。鴻臚贊拜。各官于殿門外。一拜三叩首入殿內。東西序立。序班舉。



御案置御座二。舉講案置殿內門。西東向設座位。鴻臚寺贊進講。大學士一員出班稽首禮。

上命賜坐。承旨稽首。展書官詣前展講義。退。講官坐。講畢。展書掩講義。講官稽首復班。又大學士一員出班。承旨坐講如前儀。序班舉御案。舉講案退。禮畢。有旨賜宴。眾官承旨退至幽風亭前迎候。

上乘板輿。至亭內降輿。陞御座賜宴。

論曰

高皇帝干戈未戢。文德先陳。軍旅之際。延召名儒。如戊戌之春。即召儒士許元葉瓚玉胡翰汪仲山李

公常金信徐莘童冀吳履張啟敬孫履會食寧越。行中書省。日令二人進講經史。敷陳王道。即位之後。大開講筵。靡間寒暑。時發宏議。覃為訐謨。有老師聞人。所不能窺一斑者。如

洪武三年二月御東閣。翰林學士宋濂侍制王禕等進講大學傳之。有土有人章。

上曰。人者國之本。德者身之本。人主有德。則人歸之。如就父母。有土有財。自然之理。德不足以懷眾。雖有財何用哉。十六年六月御謹身殿東閣。大學士吳沉等講周書。國則罔有立政。用儉人。



上曰。國家不可有小人。有小人。必敗君子。故唐虞任禹稷。必去四凶。魯用仲尼。必去少正卯。不幸有小人。如畜毒藥。不急去之。必為身患。小人巧于悅上。忍于賊下。人君若喜其順適。任其所為。而不問以。為怨將在彼。譬如犬馬傷人。人不怨畜犬馬者乎。沉曰。小人中懷奸邪。而其所言甚似忠信。不可不察。

上曰。然。小人喜于逢迎。彼知人主所樂。不顧非義。乃傳會曰。是可為。知人主不樂為者。不顧天下國家。亦傳會曰。是不可為。自古知人為難。知言亦不易。

也。十八年五月。御華蓋殿。大學士朱善進讀心箴畢。

上曰。人心道心。有倚伏之幾。蓋仁愛之心生。則伎害之心息。正直之心存。則邪詖之心消。羞惡之心形。則貪鄙之心絕。忠慤之心萌。則巧偽之心伏。故人常持此心。不為情欲所蔽。則至公無私。自無物我之累。九月。命大學士朱善講周易至家人。

上曰。齊家治國。其理無二。使家長幼內外。各盡其分。事事循理。則一家治矣。達之一國。天下舉而措之。朕觀其要。只在誠實而威嚴。誠則篤親愛之恩。嚴



則無閨門之失。二十年五月

上御華蓋殿。侍臣進講。因論人之善惡。感召不得其常。

上曰。爲惡或免禍。然無可爲之惡。爲善或未蒙福。然無不可爲之善。人惟修其在已。禍福聽天。彼不然者。時未至耳。二十六年秋七月。選秀才張宗濬等。俾隨詹事府左右春坊官分班入直。文華殿侍講。畢。進說民間利害。田里稼穡等事。間陳古今孝弟忠信。文學材藝諸故事。日以爲常。二十八年十一月。侍臣進講尚書無逸。

上曰。國家以勤興。以逸廢。勤與逸。理亂所繫。成王時天下晏然。周公作是書。上自天命。下至生民間里。怨詛莫不具載。朕每反覆詳味。求古人之用心。書於殿壁。朝夕省閱。以爲鑒戒。今日聞之。愈益警惕。文皇表章經學。時扞藻思。永樂二年八月。大學士解縉等進大學正心章講義。

上覽之。至再。曰。人心不可有所好樂。一有好樂。泥而不返。則慾必勝理。若心能靜虛。事來則應。事去如明鏡止水。自然純是天理。朕每朝退。默坐。未嘗不思。管束此心。又思爲人君者。但于宮室車馬服食。



玩好無所增加。則天下自然無事。

刻聖相承。崇師重道。

宣皇篤竟簡編。丕隆著述。細丹之談。流爲琬琰。宣德二年三月

上御文華殿。儒臣講孟子。

上曰。伯夷太公皆歸文王。武王伐紂。太公佐之。伯夷扣馬。見何不同。太公心在當時。伯夷心在萬世。無非爲天下計也。二年冬十月

上御文華殿。儒臣進講易觀大象畢。

上曰。古者帝王巡狩禮。後世何以不行。亦世勢不同

也。舜時五載一巡狩。二月東嶽。五月南嶽。八月西嶽。十一月北嶽。一年遍天下。五年又去。後世人君一出。千乘萬騎。百姓供億。不亦難乎。成周十二年一巡。已與虞時不同。况後世乎。予以爲治貴實效。誠如古帝王。選任賢良。撫養百姓。崇德報功。畢協至公。不患制度不一。民風不振。若以後世侍衛之衆。征求之廣。欲行時巡之禮。難矣。二年十二月侍臣進講貞觀政要。

上曰。唐太宗致治之美。庶幾成康。實本乎此。予謂安天下必先正身。未有身正而形曲。上理而下亂者。



治國猶栽樹本不搖枝葉茂盛君道清靜百姓安樂皆要語也。三年二月

上御文華殿。儒臣講舜典畢。

上曰。觀二典三謨。則知萬世君臣爲治之道。不出乎此。以閏月定四時。天道以明。奠高山大川。分別九州。任土作貢。地道以成。克明協德。協和萬邦。人道以建。九宮十二牧。後世建官不同。不出乎此。當時君臣都俞吁咈。更相告戒。用圖治功。氣象藹然。何後世之不及也。三年冬十月。儒臣進講春秋畢。

上曰。聖人匡世之功。憂世之心。備見此書。當時先王禮樂法度日廢。亂臣賊子。接迹而起。有此書而後天下皆知尊周。又曰。孔子以尊周爲本。孟子乃以王天下勸齊梁何也。聖賢之心。無非爲天下計。孟子時不有王者興。何以解生民之塗炭。遂賜講官坐。命左右賜果茗。六年三月

上御便殿。命翰林儒臣進講講大學平天下章畢。

上曰。治天下不可無財用。如生之衆。四語不必征暴橫歛。而國用有餘矣。又曰。秦誓曲盡君子小人情狀。人君審此。則好惡用舍當矣。漢唐中葉。小人倖位。妨賢病國。卒爲厲階。聖賢之言。萬世龜鑑。九年



十一月翰林侍臣講周書畢。

上因論周之王業。及成康治效。曰當時皆以周之不造。及成王定奄平淮。東土始寧。繼得罪人。又大雷電。以風王迎周公歸。遷殷頑民。而王室以安。自是刑措四十餘年。歷代八百。則知始之震撼。正天以維持鞏固之也。譬如人之身。不幸有疾。加意調治。所以培固元氣。克臻壽考。天之所定。豈偶然哉。孝皇虛懷聽納。天語叮嚀。惟恐不盡。

弘治十七年九月。召大學士劉健等至煖閣。諭曰。昨令李榮諭日講官陳善。閉邪陳宇。當作敷陳。又言他字未當。不若啓沃之。然不必深已。須直言無諱。道理皆書中本有。非是自撰。若不說盡。終無進益。論思輔導。皆所當言。可諭講官不必顧忌。昨似有顧忌耳。是日天顏甚悅。恐因此有所觀望。故特示詳悉如此。

弘治十八年三月。張元禎上疏。勸經筵講太極圖西銘性理諸書。

上嘉納之。索太極圖一觀。曰。天生此人。一開朕也。世皇銳意典謨。既以無逸名殿。時灑宸章。刊爲註疏。四年十一月。



皇明史記卷之十三  
上謂無逸一篇。

聖祖御序洪範均治天下之法。因命輔臣撰序刊布。已復再註尚書。名曰三要。六年五月諭內閣令講官及翰林官。日輪一員。將經史有關德政。與修省之道者。錄其義資所未曉。大學衍義。可宜直解。叅以時事。以開朕學。六年十月。上以日講論語。曾子有疾章。諭諸臣無忌。還當補講。又以講官董玘行立無讓之體。令輔臣諭之。玘自是見。

上屏息。

上謂其知改。令供職。既侍讀汪佃講洪範九疇。不稱旨。

上親講解其義。謂輔臣曰。人君盡倫理于上。萬姓化于下。倫序明而道大備。福將自至。以佃講讀遲鈍。令吏部改調外任。因命內閣選擇翰林諸臣稱職者留用。不稱者量材除他官。三月。

上御經筵。國子監祭酒陸深奏講章。爲內閣所改。上曰。此故事也。汝有所見。當別疏具聞。若任已意。必有雜說。以亂理學。

上幸西苑。御無逸殿。命大學士李時翟奎坐講。時講



無逸。奎講幽風七月。賜輔臣及翰儒臣宴幽風亭下。

上曰。此雖觀耕之所。亦勤學所寓。昨舉落成之禮。因命輔臣進講。賜卿等宴。卿等當協心匡輔。以濟太和。十一年九月。講官侍讀學士吳惠郭維藩進講。既退。

上諭輔臣李時等曰。講官惠言省無益之費。停得已之役。維藩言去操切更張之弊。務淳厚博大之體者。云何。卿等以朕意問之。有可補救時宜者。令條例以對。于是惠疏言。方今民窮財竭。而宮殿興作。

不已。採木燒磚。大爲川廣蘇常之患。此宜停罷。各省歲辦物料。宜勅有司。准以折色解京。從宜置辦。毋使民困於徵解之苦。此宜節省。且謂自鹽法阻壞。糧草改折。諸邊積貯空虛。宜減價惠商。疏通餘鹽。其輸邊糧草。可仍復本色。以爲足國經久之計。維藩疏言。今者士風漸漓。一切好更張。以取聲譽。以譎張爲變通。安靜爲迂腐。嚴急爲才幹。寬厚爲無能。好惡任情。不以爲耻。如此則俗簿而政龐。非細故也。宜申飭臣工。崇本實。修職業。乞于各衙門條陳之言。擇其籌慮深長。事可經久者。方賜施行。



皇明典禮志卷之十三  
毋徇操切之論。求人過甚。立法太嚴。庶幾養成惇大之俗。且請復庶吉士之選。以育人才。停選貢之例。以疏壅滯。疏上。各報聞。二臣頗有所指切。上亦不罪也。十二年十月。禮部尚書夏言以學士進講。上製聞篇賜之講。大抵國家典制。經筵于殿中。日講于殿後。經筵講官凡十有六。詞臣皆得與。日講講官惟六。不輕與。經筵日輪員。而日講日輪二員。經筵惟月之二日。又祁寒暑雨皆罷。日講不間寒暑。經筵講官執講義以進。日講則講官執牙籤。近御前口授。經筵用侍班侍儀諸臣。日講獨閣臣與講。臣耳。經筵上稱官人。日講稱先生。經筵其禮繁。其數曠。日講其體親。其功專。旒纒尊嚴。不廢課誦。幾務勞勩。不厭詩書。稱爲先生而不名。起立拱手而不爲屈。直陳時事而不諱。敷奏興衰而不爲忌。詩曰。緝熙光明。書曰。厥修乃來。聖子神孫。日新又新。當勿替引之矣。



皇明典禮志卷之十四

東宮出閣

江夏 郭正域 撰

洪武元年十一月建大本堂取古今圖書充其中。延四方名儒教太子諸王。分番夜直。選才俊之士充伴讀。上時時賜宴。賜詩。商確古今。評論文字。無虛日。

天順二年三月定。是日早禮部鴻臚寺執事官于文華後殿四拜。請東宮陞文華殿。三師三少并官僚于丹陛上四拜。以次退出。內侍導東宮至後殿。



令旨先生來。內侍以書案進。侍班侍讀講官入。一拜東西立。內侍展書。先讀書。侍讀官前伴讀。退復班。次讀經或史。侍讀官前伴讀。讀畢退。巳時侍班侍講讀及侍書官。俟陞座入。內侍展書。先侍講官進講。書退班。次講經史。侍書官前侍習字。開說點畫。退。午膳後或習騎射。凡習寫字。春夏秋百字。冬日五十字。凡是年以

上御文華殿。閱奏牘。避居殿之東廂。

隆慶六年增定。是日早侍衛侍儀如常儀。內侍先設皇太子座于文華殿之東房正中。西向。設書案于座之左。

皇太子出東陞座。提調輔臣并侍班講讀官。以次序立丹墀四拜。以次入相向立。通事舍人以講案進。內侍展書。侍讀官進讀。侍講官進講。通事舍人徹案。命賜酒飯。各官即首退。又東宮初講之時。閣臣侍五日。後每月三。八。日一至。先拜出。然後各官入供事。

論曰。太子天下本。八歲入小學。學小藝。履小節。束髮就大學。學大藝。履大節。承師問道。太傅。司其不則。而達其不及。與國之人齒曰。將君我。而與我齒。



皇明史記卷之十四  
君在則禮然。唐時皇子執篚壺酒修案。服學生之服。以見先生曰。某方受業于先生。某不敢視賓客。跪而奠篚。博士答再拜。宋制

皇太子位于殿東階下。師傅保位于殿西階西。三少位于南。俱東向北。上皇太子再拜。師傅保以下答拜。猶有三代之遺焉。

高皇天縱神聖。注意凝承。輔導國本。慨然遠覽。謂三師先達。不宜倨坐。受先生拜揖。下明詔議禮。一時廷臣。未能推廣德意。僅復其半。然猶有三師諭德分庭之意。事在集禮繪圖可考。天順而後議禮者

不能修舉故事。一切以相臨之意行之。自輔弼而下。蒲伏拜跪。傳宣唯諾。彷彿至尊。遂至無以加。蓋非洪武之舊矣。古人有言。左右正則太子正。前有與計。而後有與慮。自高皇開大本堂以來。列聖宮寮。燦然可觀也。戊寅劉基陶安言于

太祖曰。適聞中書及都督府議。倣元制設中書令。欲奏以太子爲之。

太祖曰。取法于古。必擇其善。元氏胡人。事不師古。設官不以賢。惟其類。吾子年未長。學未充。更事未多。所宜尊禮師傅。講習經傳。博通古今。他日軍國重



務皆令啓聞何必中書令乎乃命詹同取東宮官制觀之謂同等曰朕令立東宮官以廷臣勲德老成兼其職老成舊人動有典則新進之賢擇參用同對曰

陛下立法垂憲意深遠於是矣。

洪武元年正月以李善長爲太子少師兼詹事馮勝兼少詹事楊憲傳璪兼府丞徐達兼太子少傅常遇春兼太子少保鄧愈湯和兼諭德章溢兼贊善劉基兼率更令三月以劉基爲御史中丞兼太子贊善十月以梁貞王儀爲太子賓客秦鏞盧德明

張昌爲太子諭德上曰朕命卿等輔導太子必先養其德性使進于高明然後于帝王之道禮樂之教及往古成敗民間稼穡朝夕論說日聞讜言使無非僻之干積久以化他日爲政自然合道卿等勉之十一月辛丑命諸儒作鐘山龍幡賦置酒驩甚御製時雪賦安東宮官及備者各賜袍服

洪武二年四月命博士孔克仁等授諸子經定東宮官屬之制五年十二月復以宋濂爲太子贊善六年七月以儒士桂彥良爲太子正字十年十二月上諭李善長等曰人君聰明雖自天性然物理



必察識而後知。人情必諳練而後熟。若臨事不熟。驟然斷決。恐未盡善。既行之後。覺其非而欲改之。妨事已多。前者令皇太子躬奏。朝臣啓事。練習國政。恐聽覽之際。處置未當。自今政事。啓于東宮者。卿等二三大臣。更爲叅決。可否。二十五年九月。以馮勝。傅友德。李景隆。藍玉。詹徽。茹瑄。任亨。秦。杜澤。楚。樺。唐。鐸。楊。靖。皆兼東宮師傅等官。正月丙戌。上御文樓。太子侍。

上問近講經史何事。對曰。昨講漢書。七國叛漢。

上曰。孰曲孰直。對曰。曲在七國。

上曰。此講官一偏之說。宜言景帝爲太子時。常授傅局。殺吳王世子。以徼其怨。及爲帝。又聽晁錯之說。輕意黜削諸侯土地。七國之變。實由于此。若爲諸子講此。則當言藩王必上尊天子。下撫百姓。無撓公法。如此。則爲太子者。知隆親親之恩。爲諸子者。知盡君臣之義。三年四月丙申。

上召東宮官屬。及王府官屬。諭之曰。輔導之臣。由法度之器。先正己而後正人。蓋德義者。正人之法度。善惡者。修身之衡鑑。汝觀之梓匠。雖有材木。必加繩削。乃能成器。太子諸王。必得賢輔。開導贊助。乃



能成德。古人已行之事。可爲鑒戒者。采摭編次。朝夕觀覽。以廣知識。亦有助於輔導。羣臣頓首謝。復願謂劉基等曰。古賢聖之君。不忘修省。富貴易驕。必至於荒縱。未有不覆。基頓首曰。

陛下此言萬世之福也。六年九月己卯。命諸司常事。啓皇太子。重事乃奏聞。

上謂皇太子曰。人君統天下。人情物理。必在周知。然後臨事不惑。吾自起田里。至于今日。凡治軍旅。理民事。無不盡心恒慮。故嘗深念古人爲治。必廣視聽。凡言之善者。卽行之。不善者。雖不行。亦思繹至

再。果不可。然後置之。夫慮事貴明。處事貴斷。庶幾不眩。汝生長宮掖。未涉世故。若局于見聞。則視聽不廣。且目雖能視。不踰于闕耳。雖能聽。不越于庭。而欲天下之務。一一當理。難矣。汝宜親賢樂善。以廣聰明。逆言必求其善。順言必審其非。汝其敬之。七年正月乙亥。

上召太子。宮臣論之曰。汝知重器乎。對曰。商彝周鼎。太祖曰。非也。太子天下重器。人有彝鼎。尚知寶愛。太子主器之重。寶愛之者。必擇端人爲輔。朝夕與居。使熟聞善言。不邇諛行。以成其德。若委之便嬖。近



皇明史記卷之十四  
習。是委重器于塗矣。汝等日輔太子。講論誦說。必導之以正。使其道明德立。才器充廣。庶幾他日克勝重任。以副朕望。

洪武九年正月丁巳太子諸王侍。

上曰。汝等聞修德進賢之道乎。太子對曰。儒臣講說。知其略矣。未領其要。

太祖曰。藻率雜佩。爲身之容。恭遜溫良。爲德之容。見于外者。可以知內。古之君子。趨蹌有節。升降有數。周旋跬步。不違矩度者。其德充也。已德旣修。足以服人。賢者彙進。不肖者自去。天下國家。未有不治。

不知務此。鮮不敗矣。夫貨財聲色。戕德之斧斤。讒佞諂諛。杜賢之荆棘。當拒之如虎狼。避之如蛇虺。溺于所好。必爲其所陷。汝等慎之。

洪武十二年三月戊辰

上御華蓋殿。皇太子侍。

上曰。比誦何書。對曰。商周之書。

上曰。誦書亦知古君道否。君道以事天愛民爲重。其本在敬身。人君一言一行。上通于天下。繫于民。敬以將之。而後無不善。善天必鑒之。不善天亦鑒之。一言善四海蒙福。一行不謹。四海罹殃。可不敬乎。



永樂二年夏四月壬申命僧錄司左善世道衍爲太子少師。復其姓姚。賜名廣孝。賜勅諭曰。卿秉性篤實。學行老成。今建儲嗣。簡求賢輔。以卿舊人。特授太子少師。夫太子天下之本。必賴啓迪。匡正輔成。德器尚勉。盡厥職副。朕眷倚之重。又命禮部尚書李至剛兼左春坊大學士。陞翰林院侍讀學士。解縉爲本院學士。兼右春坊大學士。翰林院侍讀黃淮爲左庶子。胡廣右庶子。胡嚴左諭德。皆仍兼侍讀。翰林院侍講楊榮右諭德。仍兼侍講。以翰林院侍講楊士奇兼左春坊左中允。改北京刑部主事

尹昌隆爲左中允。陞翰林院修撰李貫右春坊右中允。仍兼修撰。命吏部左侍郎許思溫兼左春坊贊善。陞翰林院編修陳仲完左贊善。仍兼編修。檢討王汝玉爲右春坊右贊善。仍兼檢討。陞國子博士徐善述。監察御史王子沂。俱爲左春坊左司直郎。國子助教晁鑄。刑科給事中王文貴。俱爲右春坊右司直郎。刑部司務楊正爲左春坊清紀郎。國子博士楊斌右春坊右清紀郎。教授程僖教諭黃貫俱左春坊司諫。教諭張詳梁良俱右春坊司諫。陞翰林院編修楊溥中書舍人姚友直俱爲司經



皇明史記卷之十四  
局洗馬。溥仍兼編修。戶科給事中吳牧兼司經局校書。吏科給事中梁質兼司經局正字。陸教諭劉真爲校書。訓道王雅爲正字。

天順二年三月吏部禮部會翰林院選擬

皇太子出閣侍班講讀等官以聞。侍班官則吏部尚書兼學士李賢。日侍不更。太常寺少卿兼學士彭時。翰林院學士呂原更侍。詹事府詹事陳文。少詹事劉鉉。日侍不更。翰林院學士林文。李紹。劉定之。侍讀學士錢溥。更侍講讀官。翰林院學士倪謙。尚寶司卿兼侍講黃諫。尚寶司司丞兼編修萬安。尚

寶司司丞兼編修李泰。左春坊左中允孫賢。右春坊右中允劉珮。左春坊左贊善牛綸。右春坊右贊善司馬恂。八人更侍。四人一日侍書官。太常寺少卿黃采。中書舍人兼正字吳謙。二人更侍。

成化十四年二月戊申

皇太子出閣進學。命大學士萬安。戶部尚書劉翊。禮部尚書劉吉。提調講讀翰林院學士王獻。詹事府少詹事黎淳。翰林學士謝一夔。右庶子汪諧。洗馬鄭環。羅璟。更番侍班學士彭華。侍讀學士江朝宗。左庶子劉健。左諭德程敏政。侍讀周經。修撰陸錢。



皇明史記卷之十四  
九  
張昇張頤更番講讀經。改左中允昇改左贊善。修撰傅翰兼校書太常寺少卿謝字。禮部員外郎凌暉兼正字。通事舍人選除二員翌日改鴻臚寺序班耿寧紀本爲之。

弘治十一年二月甲午大學士徐溥等以皇太子將出閣講學。請以太常寺卿兼翰林院侍講學士程敏政。侍講學士楊守陞。左春坊諭德李旻。司經局洗馬梁儲。充侍班官。太常寺少卿兼侍讀學士李傑。太常寺少卿兼侍講學士焦芳。侍讀學士兼左諭德王鏊。右諭德王華。洗馬楊傑。侍讀劉機。江瀾。

白鉞。侍講武衛。左中允楊廷和。右中允張天瑞。左贊善費寵。充講讀官。編修兼校書吳儼。靳貴。禮部員外郎兼正字周文通。大理寺右寺副兼正字劉棨。俱更直供事。又請改敏政爲詹事兼學士。陞鏊爲少詹事兼侍讀學士。

上俱從之。仍命溥及大學士劉健。李東陽。謝遷。提各官講讀。

嘉靖二十一年八月甲子命翰林院編修高拱檢討陳以勤。充裕王講讀官。伴讀。改國子監助教尹樂舜。鄭守德。俱翰林院待詔。侍書中書舍人吳鼎。吳



應鳳三十二年二月丁卯

上諭大學士嚴嵩等曰。二王講讀。朕聞昨秋止將尚書過口。二三豈成學業。還自書入經。先讀大學熟記。徹講續以中庸。卿等點字若何。昔仰荷

皇考恩教。于至慈之中。朕不用力。今日何事克善。不令力學。又悞矣。嵩等對曰。

皇上追念

皇考訓思。令二王殿下力學。臣等不勝欽仰。先書入經。乃聖賢教人次弟。臣等去秋所進書程。據舊儀以大學與尚書。每日並讀並講。當導諭行。

隆慶六年二月以

東宮出閣。命禮部尚書高儀。吏部侍郎張四維。洗馬余有丁。贊善陳棟。充侍班官。少詹事馬自強。陶大臨。編修陳經。邦何。洛文。檢討沈鯉。張秩。充講讀官。檢討沈淵。許國。充校書官。制勅房辦事。大理寺左寺丞馬繼文。徐繼申。充侍書官。

皇長孫讀書

永樂五年夏四月辛卯。皇長孫出閣就學。

上召太子少師姚廣孝。翰林院待詔魯瑄。鄭禮等。諭之曰。人于學問。常以先人之言為主。朕長孫天資



明睿爾等宜盡心開導。凡經史所載孝弟仁義。與夫帝王大訓。可以經綸天下者。日與講說。浸積久。涵養深。則德性純。而器識廣。他日所資甚大。不必如儒生繹章句。工文辭爲能也。廣孝等稽首受命。賜金織羅衣各一襲。命大官給旦暮酒饌。甲午。召前禮部儀制司郎兼右春坊右贊善李繼鼎。至復以爲右贊善。命侍皇長孫說書。

親王讀書

書堂在皇極門右房。講官以部臣或進士改翰林官充之。



皇明典禮志卷之十五

巡狩

江夏 郭正域 撰

永樂六年七月己卯定巡狩禮。詔天下諸司鎮守官凡有重事。并四夷來朝。俱達行在所。仍啟聞其餘。俱達京師。啟聞施行。有疑。俱奏。自上裁。凡表文。達行在。箋文。達京師。俟車駕所至。官吏生員耆老。朝見。車駕將發。奏告天地社稷太廟孝陵。祭大江旗纛等神。斬牲。較祭于承天門。所過滁州祭滁陽王。泗州祭祖陵。鳳陽祭



皇明史記卷之五十三  
皇陵祭淮闕里祭孔子。望祭泰山。緣途古聖賢忠烈祠墳俱致祭。至北京境設壇祭北京山川。至北京奏告。

天地祭告境內山川。凡扈從在京馬步軍五萬人。內馬軍一萬。步軍五千。充

駕前軍。餘馬軍五千。步軍三萬五千。分軍率領每軍馬軍一千。步軍七千。都指揮千百戶領之。錦衣衛選將軍五百人。校尉二千五百人。力士二千人。在外馬軍一萬人。山東一千四百人。駐兗州陝西二千五百人。駐宿州遼東四千人。駐河間湖廣一千

一百人。赴京城河南一千。駐涿州。俱以都指揮一員領之。以俟扈從。在外步軍二萬人。湖廣衛武昌衛武昌左衛四千人。岳州沔陽二衛一千人。駐鳳陽安陸襄陽蘄州黃州四衛二千人。駐徐州河南南陽陳州信陽三衛一千五百人。汝寧衛一千人。駐德州河南弘農二衛一千人。駐大名睢陽歸德寧山三衛一千五百人。駐定州宣武寧國安吉三衛四千人。太原左右前三衛二千人。平陽潞州三衛二千人。駐涿州俱都指揮領之。侍從五府都督各一。首領官一。吏部堂官一。四司官五。戶部堂官



一。司官十三。禮部堂官二。司官七。鑄印局官一。兵部堂官一。司官七。刑部堂官一。司官十二。工部堂官二。司官十。都察院堂官一。監察御史二十四。通政司堂官二。首領官一。大理寺堂官一。左右侍官一。太常寺堂官二。首領官一。贊理郎四。協律郎一。司樂一。樂舞生二十。厨子五十。光祿寺堂官三。首領官一。署官十七。厨役一千。鴻臚寺堂官四。首領官一。司官司賓司儀二。署官各一。序班四十。鳴贊四。及通曉夷語者。翰林院內閣官三。侍講修撰典籍等官六。書制勅秀才八。及譯寫四夷文字監生

十三。尚寶司官二。吏科戶科禮科兵科刑科工科給事中三。禮科給事中四。中書舍人四。寫誥秀才五。行人司十五。太醫院堂上官二。御醫二。庫官一。醫士三之二。欽天監官三。天文生十五。教坊司奉鸞韶舞司樂各一。俳長樂工酌用之。各署吏役多寡不一。沿途每站增馬二十四匹。附近處車一百輛。無車處夫五百人。車駕將發。宴在京文武羣臣。賜扈從文武官員軍校鈔。在外各處劄官軍給賞車。駕至北京。宴文武羣臣耆老。賜官員人等及命婦鈔。凡五府及部院寺衛各鑄印。通政司鴻臚寺各



鑄關防。扈從官員有牙牌者。懸帶以稽出入。經過郡縣。分遣廷臣考覆守令賢否。卽加黜陟。分命給事中監察御史存問高年。賜幣帛酒肉。經過鳳陽陵戶及親戚人賜鈔六錠。耆老迎見者。人鈔三錠。泗州陵戶親戚耆老。迎見者賞如之。丙戌詔所經處。親王離城程迎。駕官吏軍民於境內朝見。非經過處毋出境。道途一切供給之費。不以煩民。諸司毋進獻。

嘉靖十八年南巡儀。先期

上祭服告

皇天於玄極寶殿。同日告聞

皇祖太廟

皇考睿宗廟。遣官分告 北郊 成祖 列聖

群廟 太社稷

帝社稷。朝日夕月

天神地祇。用祭服。輒祭於承天門。遣官祭旗纛之神。用牲醴制帛三獻。如常儀。駕出正陽門中。

后妃輦轎從。錦衣衛設欽製武陳。駕備輦輿儀仗。扈行旗校八千人。六千人。奉輿輦。二千人。執駕儀直。傳宣千百戶一百二十人。行太僕寺給各旗校馬。



三千匹。以錦衣衛指揮充前驅使。先往肅清道路。簡命武職重臣二人留守京城。兵部尚書一。叅贊機務。請勅行事。以文武大臣一。督宣大。一督薊州山海關。備文職重臣一。克行邊使。往遼東薊州宣大雁門固原九邊。戶部齎銀勞官軍。請勅行事。皇城四門。京城九門。大明門外守門。文武大臣各一。坐邊官侯伯二。增設守門官軍。給事中御史查覈京城內外。巡捕團營馬三千。分班巡警五城地方。凡重事達行在。餘達在京。通政使司封進諸司。請皇太子令旨。上有疑礙。赴行在請旨。凡扈從官府部堂屬。俱如永樂時。獨吏裁其半。

駕發。留守大臣。率在京官員吉服。赴彰義關送駕。扈從官先發。在途不朝參。惟禮兵二部。鴻臚太常科道。糾儀官從行。光祿寺辦御膳酒飯供具。凡遇行官進膳所。各撫按守巡兵備官。選精壯官軍拱衛乘輿。其扈駕官軍。戶部給行糧。工部辦釜竈。不得索害有司。混擾民舍。各軍衛有司不得糾歛。經過商店如常市貿。從駕人不得勒買。經過真定望祭北嶽恒山。用牛犢羊豕。

上具常服行禮。衛輝遣官祭濟瀆之神。用太牢鉤州



望祭中嶽嵩山之神。滎澤祭河神。俱太牢。南陽遣  
官祭武當山之神。用牲犢沿途古帝王聖賢忠臣  
烈士祠墓。禮部祭帝王用太牢。次用少牢。又次脯  
醢酒果。各處撫按三司於所屬境候  
駕。吉服見。所屬府衛州縣生員耆老。俱三十里外候  
駕至。親王常服出城候  
駕。宗室不出。

上臨舊邸詣

皇考睿宗獻宗皇帝廟謁告越四日行祭告

皇天禮於龍飛殿丹陛奉

皇考睿宗獻宗皇帝配是日

上更皮弁服詣國社壇及山川壇行告祭禮次日恭  
謁顯陵次日從駕官上表賀遂頒詔 回京

上親謝

皇天上帝

皇祖太廟

皇考睿宗遣官分告北郊列聖羣廟社稷日月天神  
地祇太歲旗纛城隍承天門之神百官上表賀如  
常儀。

論曰巡狩古禮也。文中子有言舜一歲游五岳。兵



皇明典禮志卷之十五  
衛少而征求寡也。時異世殊。

宣皇言之詳矣。

高皇平定之初。僅一巡。梁再入中都。而其儀不著。文皇六年。以將巡北京。始定巡狩之禮。而其它一征本雅。三征阿魯。與

宣皇之征彰德。出喜峯度。居庸。獵岔道。以誅韜從事。載在戎行。不與焉。

武皇駐邊關。幸南畿。六飛時駕。八駿不休。非巡狩禮也。今祇載永樂兩朝。南巡北征二儀。

皇明典禮志卷之十五終

皇明典禮志卷之十六

江夏 郭正域 撰

監國

永樂七年二月甲戌朔。勅皇太子曰。朕今巡狩北京。命爾監國天下之務。甚重。爰簡文武才德之臣。爲爾輔贊。古聖哲爲政。需賢而成者。宜悉心取益。虛已納言。整肅弘綱。康理庶務。聽言之際。宜加審擇。言當雖芻蕘從之。言不當雖王公不可聽。惟明與斷。乃克有成。至於武備。尤宜盡心。居處關防。幾務慎密。宜祇勤佩服。夙夜不忘。以副朕付託之重。遂



命禮部議

皇太子留守事宜常朝於午門左門視事其左右侍衛及京官啟事如常儀若

皇太子御文華殿承旨召入者方入凡內外軍機及王府要務以聞各處有警卽調官軍勦捕仍馳奏行在其皇城四門各城門增守衛官軍如有稱奉令旨調遣處分所司仍覆啟凡遇聖節正至先期皇太子率文武百官於文華殿前拜表設龍亭於殿中設丹陛駕大樂鳴鐘鼓皇太子具冕服於丹陛上百官朝服丹墀內十二拜如常儀儀仗鼓樂

導表由中門出皇太子由左門送至午門百官導至長安右門文官五品以上武官四品以上及近侍官監察御史俱乘馬導至三山門外以授進表官至期行告天祝壽禮於文華殿丹陛上

皇太子具冕服文武百官朝服八拜如常儀凡王府遣詣東宮者納其禮物荅否以聞遇享太廟祭社稷風雲雷雨山川之神預期勅皇太子攝祭其祀典神祇太常寺預奏行在所遣官四夷來朝循吏宴之皇太子命禮部遣送行所在給鈔錠爲道里費凡文選在京六部都察院翰林院太醫院欽天



監堂上官尚寶司通政司大理寺太常寺光祿寺  
鴻臚寺國子監正官六科都給事中并在外布政  
使王府長史吏部以聞其考滿黜陟并復職改用  
常選具啟皇太子銓注其武選五府都督各都司  
都指揮及土官奏保土人任職者兵部以聞餘襲  
贄優給及陞降改調具啟皇太子銓注大小官有  
犯所司啟問皇親有犯小事情重拘執命皇親會  
問公侯伯五軍部院寺會皇親再問具啟候車駕  
回京處分其在外王府指揮并長史及土官事干  
惡逆收問奏聞凡法司擬罪應死者以聞餘具啟

處分如特奉令旨原免者勿論

閏四月戊申勅吏部尚書兼詹事府詹事蹇義兵  
部尚書兼詹事府詹事金忠右春坊大學士兼翰  
林院侍讀黃淮左春坊左諭德兼翰林院侍講楊  
士奇曰皇太子監國所裁決庶務令六科每月以  
聞如賞一人何以賞罰一人何以罰或罰而復宥  
皆類奏勿隱

八年二月北征皇太子監國於南皇孫監國於北  
戶部尚書夏原吉等進所議督守北京事宜皇長  
孫於奉天門左視事侍衛如常儀諸司有事啟行



若軍機及王府要務一啟皇太子一奏行在萬壽  
聖節設香案於奉殿丹陛上皇長孫具色服於丹  
陛上文武官具朝服于北京刑部行禮如常儀天  
下表文詣北京四夷朝貢詣南京禮部啟皇太子  
施行其文選行在六部都察院及北京刑部所屬  
五品以上行在吏部咨南京吏部啟皇太子選補  
六品以下及考滿起復陞降復職改用常選撥用  
吏典啟皇長孫施行其武選行在五軍都督府及  
行在後軍都督府所屬襲替陞降者行在兵部啟  
皇長孫施行餘非常選者啟皇太子酌行一內外  
官吏軍民有犯啟皇長孫若皇親有犯啟皇太子  
如前儀其行在刑部都察院北京刑部議死罪啟  
皇太子待報施行餘悉啟皇長孫裁決

永樂十二年北征凡常朝於文華殿視事其在北京有  
應奏啟事俱達北京隱匿者重罪敢增損者極刑  
在京文武有犯者堂官以聞五品以下者啟治在  
外文職有犯者方面及四品以上官以聞五品以  
下啟治凡京軍布絹及邊軍士衣布戶部奏行凡  
進春於文華殿門外應天府奏進如常儀

永樂十五年三月丁亥朔上將巡守北京命禮部東



宮留守事宜凡近侍官內官內使傳令旨處分事者所司行之以聞凡內外文武大小官員俱從行在吏部兵部奏聞銓選餘悉七年巡狩事宜

嘉靖十八年二月甲寅命

皇太子監國以宣城伯衛鐔遂安伯陳鏞爲留守大學士顧鼎臣爲同留守兵部尚書張瓚叅贊機務太監麥福爲內提督與鐔等協同行事文武大臣刑部右侍郎屠僑等一十八人分守京城九門仍命內坐營官九人協守賜留守大學士顧鼎臣勅曰朕茲巡幸承天恭視顯陵車駕往回動歷數月

昨已冊立東宮今之監國特畱卿贊輔協同文武重臣居守內自禁掖外而都城遠及邊陲并大小有司庶務悉以付卿卿宜遵承朕命應啟請者請令旨應聞奏者馳奏行在其有密切緊重事情宜用欽賜印記來聞卿講幄舊臣久懷經濟朕茲重寄宜欽承之是日復召鼎臣於平臺面授手勅曰朕以二親安神之地日夜思念心甚缺焉必親見乃安非漫遊也特以畱守至託簡付於卿宜朝夕慎恭輔贊儲政朕乃心安于行卿其欽哉慎之鼎臣因條上監國事宜七事一



聖駕行後

皇太子十日一具本恭問實封馳奏一臣不時候問  
皇太子二王公主起居及宮闈消息一體奏聞一

皇太子正位東宮舊制文武百官俱朝叅朔望今宜  
令都察院鴻臚寺設糾儀官員及司儀鳴贊至日  
百官各詣文華門候朝臨時取旨放免一皇城及  
各門守備官軍臣臣不時查覈有違悞者量加懲  
戒一皇城營未得停止臣五日一閱視一內閣于  
諸司舊無統攝今臣奉欽命留守事體重大乞特  
降明旨令順天府宛大二縣及五城御史兵馬與

皇城各門守衛官軍俱聽臣約束便於行事一徃  
來多有四方奸人妖術潛住京城蠱惑愚民玩弄  
國法無所不至近聞虜中奸細散入內地間至京  
師密伺動靜尤不可忽乞容臣同留守兵部計議  
嚴督巡城御史五城兵馬及行緝事官校密切查  
訪但有奸人即與擒送究問如法重事情則奏  
聞區處

上覽奏荅曰宮中消息當密疏奏聞都察院重獄具  
在該院官其加意監守無通同疎縱鄉亦時傳朕  
諭令周期查知之勿賣主不忠也餘俱報可與臣



文請以先後所降手勅綸音下該科庶百官知儆  
臣亦得以奉命行事

上曰百司庶官分理政務近者多恣縱怠慢朕躬至  
顯陵去京師非邇卿受茲特任畱守國都贊佐東宮  
其一切事務俱當與知其有廢法徇情行私者即  
加聞諭違者如情重則具疏以聞輕者暫取令旨  
懲戒之仍令諸司遵守

凡有內外軍機各王府事務以聞其各處有警即  
調邊軍勦捕仍聞行在畱守武職大臣同叅贊尚  
書每日操閱凡稱奉令旨調遣處分所司復啟五

府九卿各衙門有重事俱以聞其進繳精微勤宴  
賞宮軍俸糧五府比試如例啟行凡祭祀至期太  
常寺啟請遣官行禮郊廟社稷之祭候勅命行其  
拜進表箋大禮者詣行在所其進賀中宮東宮箋  
文禮部類進司禮監官捧進各王府進慈孝獻皇  
后香并南京進香官朝鮮國吊使禮禮部啟請司  
禮監官捧進給賞凡吏部會推在京堂上官六科  
都給事中在外方面官知府在吏部奏請其大選  
急選及考滿復職如例啟行凡各王府請給誥命  
勲臣襲爵追封京官贈謚公侯伯內外文職官誥



勅兩京官廕子士官襲職俱行在吏部奏行凡兩京五府錦衣衛在外總兵叅將都司兵部奏請擢用其大選軍職士官襲替及保用通事隨司辦事具啟裁度各處奏報邊功應覈應賞俱啟行在外撫按官劾奏不職文武官方面以上武官叅將以上奏聞凡赴行在奏事人兵部啟傳行各王府重情詣行在奏聞其請名請封請婚在京啟行四夷朝貢賞宴如例啟行凡法司擬罪重情奏聞餘具啟決放內外大小官員有犯啟問情重奏聞都察院差巡按御史具奏行在餘差及考察俱啟行通政司奏本每日封進有疑礙難行者馳赴行在論曰太子出曰撫軍守曰監國三代以上稱既宏唐太子監國結雙龍符而其儀不著至我明而兩見于永樂一見于嘉靖治政安邦辨名定本疑惑不生萬幾有托嗚呼盛哉



皇明典禮志卷之十七

江夏 郭正域 撰

鹵簿儀仗

洪武五年三月辛未禮部言周制天子出入條狼氏夾道以辟止行人漢制則鹵簿前驅持弓以射窺者唐宋清道慝弩辟止行人惟迎駕之人仗外迎拜今定擬車駕出入有司肅清道路官民勿觀望官員父老迎駕者於仗外路右俛伏若遇駐驛迎駕之人五拜

六年八月庚寅詔禮官考五輅制度



皇明典禮志 卷之十七  
上曰五輅起於成周玉輅太奢今止用木輅朱漆之  
朴素渾堅奢儉得中爲二乘一不用革祭祀用之  
一以皮鞞行幸用之

九年十月乙亥金吾右衛指揮同知素義等進大  
駕出入侍衛部列圖凡隨駕之兵各依隊伍布列  
騎兵百戶領執盾之卒侍衛指揮列於盾前

上所幸處雖大臣不得往來其無兵仗者亦不得輒  
至侍從大臣皆列隨駕兵士後有宣召由道左右  
以進或值衢巷恐有衝突各設八尺短兵五枝以  
衛內官離駕後一十五丈

上曰內官有職事者稍近後行無職事者傍行勿令  
居兵衛中

二十六年定凡正日冬至聖節錦衣衛陳鹵簿大  
駕於殿之東西 凡鹵簿大駕惟郊祀幸太學耕  
籍田用之如祭社稷祭太廟祭山川則於鹵簿大  
駕內去白澤以下至玄武豹尾大涼步輦至大輅  
不設其郊祀前期視牲則用丹陛駕

永樂元年八月禮部言鹵簿中宜有九龍車一乘又  
舊有金鉦紅鼓魀灯紅灯請增製

上曰禮貴得中過爲奢不及爲儉先期定禮審之精



矣後世子孫遵用舊章當自朕始豈可輒有增益以啟後世之奢哉九龍車既先期所無即不可增舊有而今闕者令工部補造

大駕鹵簿

肅旗一黃質黑字硃竿 靖旗如肅旗 金鼓旗二黃質紅金鼓二字硃竿紅纓鐵積 金龍畫角二十四枝木質黑漆金飾上寶相花中雲龍下八寶海馬二 鼓四十八木匡紅飾繪寶相獅毬金四 金鈿四銅質竹匡 杖鼓四木匡細腰黑飾金雲龍文聯以紅綆加銅 龍首鈎 板四鐵

力木各六貫以青絲組 皂纛二用旄牛尾如巨斗大建朱竿上抹金銅寶蓋大豹尾一朱竿懸紅絲拂垂豹尾金銅龍首共長一丈三尺四寸九分銅頂垂銅鈴圍瓷珠懸三色鬚中垂大豹尾長五尺 金龍旗十二青質黃欄繪金龍 北斗旗黑質塗金為七星 門旗八赤質黃欄塗金門字黃旗四十黃質硃竿 日旗月旗各一青質黃欄繪日赤繪月白 朱雀旗一赤質繪朱雀玄武旗一黑質繪龜蛇青龍旗一青質繪蹲龍白虎旗一白質繪躡虎 風雲雷雨旗各一青質黃欄風畫



箕星雨畫畢星雲畫雲氣雷畫雷文 四瀆旗各  
一江赤質河白質淮青質濟黑質俱黃欄中繪水  
形 五嶽旗各一東嶽青質南嶽赤質中嶽黃質  
西嶽白質北嶽黑質俱黃欄中繪山形 五星旗  
各一木青質火赤質土黃質金白質水黑質俱黃  
欄中塗金星形 天祿旗一赤質黃欄繪天鹿白  
身綠尾一角 天馬旗一赤質黃欄繪馬形兩肉  
翼 白澤旗二赤質繪白澤龍首綠髮戴角四足  
熊旗羆旗各一赤質黃欄繪熊羆 鸞旗麟旗  
各一赤質黃欄繪鸞麟 列宿旗二十八青質黃

欄塗金爲本宿形 麾下 戲竹一簫十二 笙  
十二 龍笛十二 頭管十二 方響四 箏四  
琵琶八 箜篌八 杖鼓三十六 板四 大鼓  
二 五和韶樂 鹿一 槐一 敵一 桴拊二  
琴十 瑟四 簫十二 笙十二 笛十二  
埙四 篪四 排笛四架 偏鐘二架 偏磬二  
架 應鼓二 黃麾二絳羅帛爲之如旛金書黃  
麾字下塗金交龍雲日朱竿金龍首上垂朱綠蓋  
四角垂佩末橫板碾玉文其長一丈二尺五寸四  
角紅羅寶蓋抹金銅龍首繫抹金銅佩十六間銅



鈴三十六寶蓋下腰黃羅三簷銷金雲龍文 紅  
纛二珠竿金首長一丈三尺九寸髦尾染紅簇爲  
纛上施寶蓋絡瓷珠 紅節二珠竿髦尾紅簇如  
斗大綴瓷珠 小銅角二大銅角二俱金飾 纓  
頭一珠竹竿金飾髦牛尾紅簇共長一丈一尺四  
寸九分 弓矢一百弓黑矢朱 御杖六十珠竹  
銅首末長四尺九寸 誕馬二十四紅轡黃韁錦  
韉領頭十二珠竹銅裹長四尺九寸 絳引旛十  
朱竿金龍首朱綠蓋四角垂佩繫五色間暈髦末  
橫板碾玉文 告止旛十黃羅繡青告止字承以

雙鳳餘如絳制引 傳教旛十如告止旛繡傳教  
字承以雙金龍 信旛十如傳教額黃羅繡青信  
字 豹尾四珠竿長一丈二尺五寸金龍首藍斜  
皮寶蓋圍銅鈴中垂豹尾四尺五寸 龍頭竿繡  
髦十竿如戟鈎下小橫木龍首垂紅蓋五角綴紫  
錄金裙連綴青髦帶五繡鳳末垂金鈴珠佩長一  
丈二尺五寸 羽葆幢十珠竿金龍首綠蓋紅髦  
五層上戴白羽長一丈二尺五寸五分下貫紅纓  
簇圓凡五層 戟髦二十爲戟枝黃金塗之龍首  
朱竿在車輪外赤質畫雲氣上綴飛掌垂五色帶



毛鈴 戈斃二十爲戈刃黃金塗之龍首朱竿畫  
雲氣升降二鳥綴五色旛帶末綴金鈴 儀鎧斃  
二十如斧刻木爲之謂之儀鎧塗刃以青柄以朱  
畫雲氣上綴小錦旛五色帶垂銅鈴 單戟六朱  
竿金龍首 龍戟六枝龍首 黃蓋四紅漆直柄  
黃羅表銷金飛龍形金葫蘆大繖赤質紫表平頂  
而圓上繡金飛龍瑞草金浮屠 華蓋四上加雲  
氣花蔕金浮屠赤質圓頂隆起上繡雲氣花蔕朱  
漆直柄金浮屠濶四尺七寸五分長一丈一尺二  
寸九分 曲蓋赤質紅裏平頂而圓曲柄上繡瑞

草 紫方繖四赤質正方四角銅螭頭紫羅表垂  
三層金浮屠 紅方繖四如紫方繖紅羅表無飾  
金浮屠 雉扇十二下方上圓直柄緋羅心外周  
繡雉尾中爲鸞鳳文青羅背銷金寶珠花面風衣  
高一丈一尺二寸 紅團扇十二赤質繡五色雜  
花朱柄 朱雀玄武青龍白虎幢各一幢如節用  
毫毛而五層繡四神隨方朱雀幢緋紗衣玄武幢  
皂紗衣白虎幢白紗衣長七尺五寸濶一尺二寸  
斑劍六刻木爲劍鞘飾金龍取裝飾斑斕之義  
劍鞘黃質紫斑衣紫絲帔鎔 儀刀六刻木爲刀



綠銷銀地金塗花龍飾鞘紅絲絲帔鎔 金鉞六  
朱竿刊木爲斧承以龍首長六尺九寸 鐙杖六  
金龍首銜木馬蹬貫朱漆捧首金飾棒末長六尺  
九寸 吾杖六木爲之朱漆八稜金飾兩末長六  
尺九寸 卧瓜立瓜各六製如瓜形塗以黃金卧  
瓜則卧立瓜則立承以龍頭 響節二十四金塗  
竹杖首貫銅錢黃金袋冒之長一丈二寸五分方  
天戟三十二殊竿木戟承龍首金飾 黃曲柄繡  
傘二抹金銀鈴金葫蘆黃羅繡綵雲文三簷雲龍  
文曲處金龍首承之 紅曲柄繡傘四 青銷金

傘三金葫蘆冒羅銷金雲龍香草文 紅銷金傘  
三 黃銷金傘三 白銷金傘三 黑銷金傘三  
黃油絹銷金雨傘一金葫蘆銷金寶珠龍文邊如  
意龍文 紅繡花扇十二面背風衣紅羅面繡四  
季花背銷金龍團花文 紅單龍扇一十共高一  
丈一尺二寸面背大紅羅繡龍雲團花文 黃單  
龍扇一十共高一丈一尺二寸面背皆黃羅繡雲  
龍團花文 紅雙龍扇二十共高一丈一尺二寸  
面背紅羅繡雙龍團花文 紅羅素扇二十  
黃羅素扇二十 壽扇二制同雙龍扇 黃羅銷



金九龍傘一 黃羅曲柄繡九龍傘一 紅紗燈

籠十二紅紗蒙之硃竿金龍首 紅油紙燈籠六

竹骨竹絲編籠 鮑燈六用鮑為之 鍍金銅玲

龍香爐一 寶匣一紅蓋金雲龍文仰覆蓮花香

草文 硃紅馬杌四 仗馬六鞍 籠二硃飾金

升降龍文 黃帳房一黃木綿布帳幃幕上施獸

吻硃柱杖竿首綵粧蹲獅毡頂 金節六黑竿上

施圓盤綴紅絲拂八層黃繡龍袋籠之 骨朵六

朱竿金飾上貫骨朵承以龍首 金交椅椅踏木

質金葉裏鈹花雲龍文黃織金紵絲褶襠 鳴鞭

四以黃絲稍讀以蠟柄龍首木質 金馬杌一金

葉裏鈹盤龍雲文 拂子四紅纓青毳尾籠之抹

金銅龍首朱柄黃絲結帔鍔 唾壺唾盃各一黃

金為之壺小口巨腹蓋大如腹盃圓形如缶下有

盤俱龍文 金水盆一平底列瓣為芙蓉鈹盤龍

雲香草文 金水罐一黃金為之有蓋有提小口

巨腹純質不加飾香合黃金為之蓋綴龍文邊鈹

香草文 香爐一黃金為之大口細頸巨腹三足

蓋為蹲龍飛鳳為耳硃竿舉之竿首銅龍頭其下

龍尾 大輅一其制通高丈三尺六寸九分面濶



五尺六寸五分輅身長八尺九寸轅條二各長二丈一尺三寸九分頂盤方八尺四寸五分頂蓋青文綺輓罩上安金銅龍一玉色地明金龍耀葉板八十一片漆圈三層上有耀葉板青綠飭斗拱硃圓盤間八頂黃文綺綳嵌繡九龍硃廂硃屏正南飾金雲龍四周雕雲龍花板并金雲龍疊勝花窓硃曲闌二直闌一綵飾明金鈴鑼雲板闌柱上金蹲龍紫檀香色座黃絨瓣金硃轅條二護泥鴈翅板前後鴈翅下有千斤木粧五綵翔禽海獸硃輪心木一時持金銅龍首鉄簪二硃捍四硃漆車下

脚輪二持金鐵龍六花周圍過輞硃大小升梯二紅象鞍二硃行馬二象鞞轡二黃帷大常旗二上繡雲龍十二左旗繡日月星竿首銅龍首右旗繡黻文竿首銅戟十二旂紅纓球二十四青絲條結二五色線并鐵鎖黃文綺帷幙裙瀝水索羅帶黃文綺輪衣三層八十一片各繡雲龍錦褥一黃絹雨衣一座褥四紅竹簾三花毡簾大小二白花毡鞍籠二青文綺絡帶四黃文綺墊褥一絨錦褥一担皮大小七黃羅單帷幙一儀鸞司掌之玉輅如大輅但青地彫木飾玉色雲龍文大馬輦一



乘高一丈二尺五寸九分濶八尺九寸五分轆三  
條各二丈五寸九分輦亭高六尺四寸九分四周  
抹金銅鈹花葉片輦頂并圓盤高二尺六寸五分  
盤上下無尺寸無內外角面雲彩輦亭前直欄一  
後曲闌一左右欄二硃飾一十四柱柱首金蹲龍  
一餘如大輅 小馬輦一乘高一丈一尺五寸九  
分濶七尺九寸五分轆二條各長一丈九尺五分  
輦亭高五尺五寸九分紅飾四柱圓盤下用黃綺  
繡幔四扇餘如大馬輦 步輦一乘高一丈二尺  
二寸五分座高三尺二寸五分方濶八尺二寸五

分輦座硃飾四周五彩雲金龍板十二片間以金  
仰覆蓮座其下雕金五彩雲板二十片轆四條中  
二條各長三丈五尺九寸左右二條各長二丈九  
尺五寸九分輦亭高六尺三寸九分四柱各長六  
尺二寸五分四周雕木沉香色繪金香花板十二  
片抹金銅鈹花葉片前并左右硃榻雕飾沉香色  
繪雲龍板八片其下雲板如其數後硃屏雕沉香  
繪金雲龍五四周施黃綺幔帳亭外青綺綠硃簾  
十餘如大馬輦不用太常旗 大涼步輦一乘高  
一丈二尺五寸九分四面硃飾青地雕木五彩雲



粧板二十片間金仰覆蓮座其下硃如意環板如其數硃轅六條中二條各長四丈三尺五寸九分左右二條各長四丈九分左右二邊二條各長三丈六尺五寸九分前後飾雕木金龍頭龍尾輦亭高六尺五寸九分濶八尺五寸九分四周沉香色繪金香草板十二片前左右榻明欵金皆硃飾四周施黃綺幃幔闌干柱首雕木金蹲龍內大紅錦墩二亭外青綺綠硃紅簾三硃頂黃線圓縹四上冒紅粘四垂黃壇爲如意雲周圍施黃綺瀝水三層每層一百三十二摺間繡五彩雲龍文冒頂黃

羅爲如意 雲緣條瀝水亦用黃羅 四周以紅壇爲幃亭內寶蓋繡五龍頂 以硃木匡冒黃綺 謂之黃屋頂心周圍繡雲龍各一輦亭四角至輦座用黃線圓縹四條并貼金木魚輦前曲闌二後直闌一雕木渾金龍間以五彩雲板三餘如大輅紅板轎一乘高六尺九寸五分頂高一尺六寸五分硃飾近頂裝圓圭蜩殼窓在上鍍金銅火燄寶珠帶仰覆蓮座高六寸九分四角金雲朵轎扛二前後鍍金銅龍首龍尾四圍硃板左右門二黃絹衣并雨衣各一青壇衣一紅壇綠



凡正旦冬至聖節冊拜親王及蕃使來朝金吾衛  
於奉天門外分設旗幟宿衛于午門外分設兵仗  
衛尉寺於奉天殿門及丹陛丹墀設黃麾仗內使  
監擎執於殿上其宣詔赦降香則惟設奉天殿門  
及丹陛儀仗殿上擎執其陳布次第午門外刀盾  
受叉各置於東西甲士周赤 奉天門外中道金  
吾宿衛二衛設龍旗十二分左右用青甲士十二  
人北斗旗一纛一居前豹尾一居後俱用黑甲士  
三人虎豹各三馴象六分左右左右布旗六十四  
左前一行門旗二每旗紅甲士五人一人執旗四

人執弓箭二行月旗一白甲士五人一人執旗四  
人執弩青龍旗一青甲士五人一人執旗四人執  
弩三行風雲雷雨旗各一每旗黑甲士五人一人  
執旗四人執弓箭天馬白澤朱雀旗各一每旗紅  
甲士五人一人執旗四人執弓箭四行木火土金  
水五星旗各一隨其方色每甲士五人一人執旗  
四人執弩其甲木青火紅土黃金白水黑熊旗鸞  
旗各一每旗紅甲士五人一人執旗四人執弩五  
行角亢氐房心尾箕旗各一每旗青甲士五人一  
人執旗四人執弓箭六行斗牛女虛危室壁旗各



一每旗青甲士五人一人執旗四人執弩右一行  
門旗二每旗紅甲士五人一人執旗四人執弓箭  
二行日旗一紅甲士五人一人執旗四人執弩白  
虎旗一白甲士五人一人執旗四人執弩三行江  
河淮濟旗各一隨其方色每旗甲士五人一人執  
旗四人執弓箭其甲江紅河白淮青濟黑天祿白  
澤玄武旗各一每旗甲士五人一人執旗四人執  
弓箭天祿白澤紅甲玄武黑甲四行東南中西北  
五嶽旗各一隨其方色每旗甲士五人一人執旗  
四人執弩其甲東嶽青南嶽紅中嶽黃西嶽白北  
嶽黑熊旗麟旗各一每旗紅甲士五人一人執旗  
四人執弩五行奎婁胃昴畢觜參旗各一每旗青  
甲士五人一人執旗四人執弓箭六行井鬼柳星  
張翼軫旗各一每旗青甲士五人一人執旗四人  
執弩

奉天門內拱五輅玉輅居中左金輅次革輅右象  
輅次木輅俱並列典牧所設乘馬於文武樓之南  
各三東西相向丹墀左右廂布黃麾仗凡九十分  
左右各三行左前一行十五黃蓋一紅大傘二華  
蓋一曲蓋一紫方傘一紅方傘一雉扇四朱團扇



四二行十五羽葆幢二豹尾二龍頭竿二信幡二  
傳教幡二告止幡二絳引幡二黃麾二三行十五  
黃蓋一紅大傘二華蓋一曲蓋一紫方傘一紅方  
傘一雉扇四朱團扇四二行十五羽葆幢二豹尾  
二龍頭竿二信幡二傳教幡二告止幡二絳引幡  
二黃麾一三行十五戟斨五行儀鎧斨五皆  
校尉擊執服交脚幘頭紅綠辟邪獸團花裙襖銅  
葵花束帶皂鞞丹陛左右廂拱衛司陳幢節等仗  
九十分左右爲四行左前一行響節十二金節三  
燭籠三二行青龍幢一斑劍三梧杖三立瓜三卧  
瓜三儀刀三鐙杖三戟三骨朶三朱雀幢一右前

一行響節十二金節三燭籠三二行白虎幢一斑  
劍三梧杖三立瓜三卧瓜三儀三鐙杖三戟三骨  
朶三玄武幢一皆校尉擊執服同上 奉天殿門  
左右拱衛司陳設左行圓蓋一金脚踏一金水盆  
一團黃扇三紅扇三右行圓蓋一金交椅一金水  
罐一團黃扇三紅扇三皆校尉擊執服如前殿上  
左右內使監陳設左拂子二金唾壺一金香盒一  
右拂子二金唾盂一金香鑪一皆內使擊執

儀仗



皇朝典禮志 卷之十一  
十四  
吳元年十二月宣國公李善長等進儀衛上見仗內  
旗有天下太平皇帝萬歲字顧謂善長曰此誇大  
詞也古者九旗之制各有其屬若日月蛟龍熊虎  
鳥隼龜蛇之類所以昭儀物辨等威若太平萬歲  
之名此直誇耳莫若以天祐邦家海宇康寧易之  
庶幾順理旣而復語之曰此亦近誇宜并去之  
先是

上將幸天壽山諭禮部巡狩鹵簿當與出郊不同義  
須尚武尋御製天子武陣及太武冠服制式示尚  
書夏言且諭之曰朕此二制卿其註圖行今次不  
及後用之至是言繪二制以進

### 丹陛駕

常朝日奉天門設丹陛駕於午門外及金水橋單  
龍戟六雙親戟六斑劍吾杖六儀刀六立瓜六卧  
瓜六鐙杖六金鉞六骨朶六單龍扇二十雙龍扇  
二十黃華傘二黃曲柄傘二五方傘五鳴鞭四條  
弓矢五十副

嘉靖十八年聖駕南巡欽定油羅黃蓋五立瓜四卧  
瓜四斧八戟八鉞四鐵造三尖刀四鴈翎刀四斬  
馬刀十二三股叉四戟四劍四竹節鋼鞭四鐵簡



二鐵杖二弓矢二十四副戈六矛六大銅角六小  
銅角六音樂六把捷字旗牌鎗六賞字旗牌鎗六  
戮字旗牌鎗四威字旗牌鎗十二敢字旗牌鎗六  
勇字旗牌鎗十釋字旗牌鎗二  
郊祀弔喪臨祭車駕出入合用羽儀導引定制陳  
布毋得相參

太皇太后皇太后

鹵簿

太皇太后皇太后俱同紅杖二對清道旗二黃  
麾二絳引旛六傳教旛四告止旛四信旛四龍頭  
竿十儀鍠斝十戈斝十戟斝十吾杖六立瓜六卧

瓜六儀刀六斑劍六鐙杖六金鉞六骨朶六響節  
十二羽葆幢四紫方傘二紅方傘二黃銷金傘一  
黃繡曲柄傘二紅繡傘一紅繡圓傘二紅繡雉方  
扇六紅繡花圓扇六青繡方扇六紅羅素圓扇六  
黃羅素圓扇六拂子四紅紗燈籠四紅油紙燈籠  
二鮐燈二金交椅一金脚踏一金水盒一金水罐  
一金香爐一金香盒一金唾盂一金唾壺一行陣  
二葉坐障一葉輅一乘高一丈一尺三寸四分輳  
三條各長一丈九尺六寸用抹金銅鳳頭鳳尾鳳  
翎葉片裝釘四周俱繪寫鳳雲文余同玉輅安車



一乘高九尺七寸六分轆二條各長一丈六尺七寸六分車亭高四尺四寸四周五彩花板十二片施黃綺幃幔亭外周青綠紅簾四車蓋硃脚高二尺六分抹金銅寶硃頂蓮座四角抹金銅鳳頭紅漆木蓋下施黃瀝水三層銷金鸞鳳文鳳頭下垂紅幃踏梯一余同輅

丹陛儀仗

儀仗三十六人黃麾二戟五色繡旛六戈五色繡旛六鎗五色錦旛六小雉扇四紅雜花團扇四錦曲蓋二紫方繖二紅大繖四丹墀儀仗五十八

人班劍四金梧杖四立瓜四臥瓜四儀刀四鎗杖四骨朶四斧四響節十二錦花蓋二金交椅一金脚踏一金水盆一金水罐一方扇八宮中常用儀衛二十人內使八人青五色繡旛二金斧二金骨朶二金交椅一金脚踏一宮女十二人金水盆一金水罐一金香爐一金香盒一金唾壺一金唾盂一拂子二方扇四宮女服用紫色圓領穿袖徧刺折枝小葵花于上以金圈之硃絡縫金束帶紅裙弓樣鞵烏紗帽飾以花帽額綴團珠結珠鬢梳垂珠耳飾



皇妃鹵簿

洪武初定戈繡旛二鎧繡旛二降引旛二斑劍二梧  
杖二立瓜二卧瓜二儀刀鎧杖二骨朶二斧二響  
節四金鍍銀交椅一金鍍銀脚踏一金鍍銀水盆  
一金鍍銀水罐一以上兼用內使校尉擊執厭翟  
車駕二馬馭士十九人紅方扇四紅蓋一紅大繖二

皇妃儀仗

永樂三年定紅杖三清道旗二絳引旛二戈斃二戟  
斃二儀鎧斃二吾杖二儀刀二斑劍二立瓜二卧  
瓜二鎧杖二骨朶二金鉞二響節二青方傘二紅

繡圓傘一紅繡方傘四紅花圓扇四青繡圓扇四  
間抹金銀交椅一間抹金銀脚踏一梯子二間抹  
金銀水盆一間抹金銀水罐一間抹金銀香爐一  
間抹金銀香盒一間抹金銀唾盂一間抹金銀唾  
壺一紅紗燈籠四鳳轎一乘青頂上抹金銅珠頂  
四角抹金銅飛鳳四各垂銀圓寶蓋并綵結轎身  
硃紅漆木匡四面篾織紋簾繪以翟文抹金銅鈸  
花葉片裝釘硃紅漆木轎扛抹金銅鳳頭鳳尾裝  
青銷金羅綠邊硃紅簾并看帶內紅交床并坐踏  
褥紅銷金羅轎衣一頂銷金寶珠文瀝水香草文



看帶并帟皆鳳文行障二葉紅素綾爲之繪雲鳳  
瀝水香草文坐障一葉紅素綾爲之繪雲鳳文

東宮鹵簿

洪武二十六年凡出入依制陳導定金交椅一金盆  
鐘各一紅紵拜褥一青孔雀扇六青花扇四青方  
扇四紅繡銷金傘一紅羅銷金雨傘一羽葆幢六  
絳引旛二儀鎧斃六戈斃六戟斃六金節四響節  
十二骨朶四金鉞四金鐙四立瓜四卧瓜四儀刀  
四班劍四吾杖四戟十二紗燈六鮑燈六帳房一  
帷幕一金馬杙一

永樂三年增定

東宮令旗二青質紅金字清道四憶弩一刀盾二十  
弓箭二十白澤旗二青旗二紅旗二黃旗二白旗  
二黑旗二青素旗二十金鼓旗二金龍畫角十二  
枝花匡鼓二十四桐鼓二金鉦二金二板二笛二  
管枝鼓二小銅角二大銅角二纓頭一戲竹二大  
鼓一板一串杖鼓十二龍笛二笙二筚篥二簏二  
琵琶二方響二頭管二簫二領頭八絳引旛二傳  
教旛二告止旛二信旛二羽葆幢六儀鎧斃六戈  
斃六戟斃六吾杖六儀刀四班劍四金鉞四立瓜



皇明典禮志卷之十七  
四卧瓜四骨朶四鐙杖四爻义二戟二十稍二十  
夾稍二麾一幢一節一金節四響節十二青方傘  
二紅方傘二紅銷金傘一紅繡直柄圓傘一紅繡  
曲柄圓傘二紅繡花直柄傘二紅圓傘二青圓傘  
二紅油絹銷金雨傘一青繡孔雀圓扇六青繡花  
圓扇四紅繡孔雀方扇四青繡花方扇四誕馬八  
匹鞍籠一金杙一金交椅一金脚踏一拂子二紅  
紵絲拜褥一金水盆一金水罐一金香爐一金唾  
盂一金唾壺一紅紗燈六紅油紙燈籠六鮎燈六  
仗馬二匹鞍籠二金輅一青帳房一金輅一乘高

一丈二尺二寸九分濶八尺九寸轅三條各長一  
丈九尺五寸面至地三尺二寸五分頂心繡雲龍  
一餘繡五彩雲文天輪三層硃飾內飾青地瀝水  
三層每層七十二摺紅旗二面垂紅纓九行馬架  
三

### 東宮儀仗

門外中道設龍旗六其執龍旗者並用戎服黃旗  
一居中左前青旗一右前赤旗一左後黑旗一右  
後白旗一每旗執弓弩軍士六人服各隨旗色殿  
下設三十六人絳引旛二戟麾六戈麾六鐙麾六



羽葆幢六青方繖二青小方扇四青雜花團扇四  
皆校尉擎執服交脚幞頭紅綠辟邪獸團花裙襖  
銅葵花束帶皂鞞殿前設四十八人斑劍四梧杖  
四立瓜四臥瓜四儀刀四鐙杖四骨朶四斧四響  
節十二金節四以上皆校尉擎執服同上殿門設  
十二人金交椅一金脚踏一金水罐一金水盆一  
青羅團扇六紅圓蓋二以上皆校尉擎執服並同  
上殿上設六人金香爐一香盒一唾壺一拂子二  
以上皆內使擎執服烏紗交脚帽盤領衣鹿花育  
背角束帶皂鞞

東宮妃鹵簿

戟繡幡二戈繡幡二鍠繡幡二降引幡二班劍八  
梧杖二立瓜二卧瓜二儀刀二鐙杖二骨朶二斧  
二響節四金鍍銀交椅一金鍍銀脚踏一金鍍銀  
水盆一金鍍銀水罐一以上兼用內使校尉擎執  
獸翟車駕 馬馭士 人紅方扇四紅蓋一紅大  
繖二

東宮妃儀仗

永樂三年定紅杖二清道旗二絳引幡二儀鍠二  
戈斃二戟斃二梧杖二儀刀二斑劍二立瓜二卧



瓜三鐙杖二骨朶二金鉞二響節四青方傘二紅  
繡圓傘一紅素圓傘二紅繡方扇四紅繡花圓扇  
四青繡圓扇四抹金銀交椅一抹金銀脚踏一拂  
子二抹金銀水盆一抹金銀水罐一抹金銀香爐  
一抹金銀香盒一紅紗燈籠二對鳳轎一乘與皇  
妃同小轎一四柱硃漆上施抹金銅珠頂四角抹  
金雲朶扛金鳳頭尾幔頂用礮紅紵絲行障二葉  
以紅素綾爲之繪雲鳳文瀝水香草文坐障一葉  
以紅素綾爲之繪雲鳳文

親王儀仗 世子同

洪武六年初定二十六年再定其制俱簡

永樂三年增定令旗二青道四憶弩一刀盾二十弓  
箭二十白澤旗二金鼓旗二畫角十二花匡鼓二  
十四杖鼓二金鈺二鑼二柁鼓二板一串笛二小  
銅角二大銅角一對戲竹一對大鼓一板一串杖  
鼓十二笛四頭管四絳引幡二傳教幡二告止幡  
二信幡二儀鎧斃二戈斃二戟斃二吾杖二儀刀  
四班劍二立瓜二卧瓜二骨朶二金鉞二鐙杖二  
爰叉二戟二十稍二十夾稍二麾一幢一節一響  
節八紫方傘二紅方傘二紅銷金傘一紅繡圓傘



一紅曲柄傘二紅油絹銷金雨傘一青繡圓扇四  
紅繡圓傘四紅繡方扇四誕馬八疋鞍籠一金馬  
杌一拂子二間抹金銀交椅一間抹金銀脚踏一  
間抹金銀水盆一間抹金銀水罐一渾抹金銀香  
爐一渾抹金銀香盒一間抹金銀唾盂一間抹金  
銀唾壺一紅紵絲拜褥一紅紗燈籠四紅油紙燈  
籠四鮑燈二象輅一乘高一丈一尺六寸九分濶  
七尺九分轆各長一丈八尺五寸輅亭高五尺二寸  
九分硃飾四用硃繚環板門高四尺五寸九分濶  
二尺二寸五分左右門濶同左右硃桶二抹金銅  
級花葉片後硃屏四周紅羅幃幔亭外紅綺綠紅  
簾十二輅頂并圓盤蓮座用抹金繡雲龍一餘繡  
五彩雲文天輪三層皆硃飾上安雕木金邊耀葉  
板六十三內飾青地雕木五彩雲文輅亭前直欄  
柱首紅蓮花紅旗二面每面六旂紅纓五餘同大  
馬輦

親王妃儀仗

公主世子妃同

永樂三年定紅杖二青道旗二絳引旛二戟斨二吾  
杖二儀刀二班劍二立瓜二卧瓜二骨朵二鐙杖  
二響節四青方傘二紅彩畫雲鳳傘一青孔雀圓



皇明典禮志 卷之十七  
扇四紅花圓扇四間抹金銀交椅一間抹金銀脚踏一間抹金銀水盆一間抹金銀水罐一紅紗燈籠四拂子二鳳轎一乘小轎一乘行障二葉坐障一葉

郡王儀仗

永樂三年定令旗二清道四幟弩一刀盾十六弓箭十八副金鼓旗一對畫角十枝花匡鼓二十擗鼓一金鈺一鑼二板一串笛二戲竹一對大鼓一板一杖鼓八笛四頭管四絳引旛二傳教旛二告止旛二信旛二吾杖二儀刀四立瓜二骨朵二斧戟

十六稍十六麾一幢一節一響節三對紅銷金圓傘一紅圓傘一紅曲柄傘二紅方傘二青圓扇四紅圓扇四誕馬四疋鞍籠一間抹金銀馬杌一拂子二間抹金銀交椅一間抹金銀水罐一渾抹金銀香爐一渾抹金銀香盒一紅紵絲拜褥一紅紗燈籠二對鮎燈一對帳房一座

郡王妃儀仗

永樂三年定紅杖二清道旗二絳引旛二戟斨二吾杖二斑劍二立瓜二骨朵二響節二青方傘二紅圓傘一青圓扇二紅圓扇一把間抹金銀交椅一



皇明典禮志 卷之十七  
二四  
間抹金銀脚踏一拂子二紅紗燈籠一間抹金銀  
水盆一間抹金銀水罐一翟轎一行障二葉坐障  
一葉

郡主儀仗

永樂三年定紅杖二清道旗二斑劍二吾杖二立瓜  
二骨朶二響節二青方傘一紅圓傘一青圓扇二  
紅圓扇二間抹金銀交椅一間抹金銀脚踏一間  
抹金銀水盆一間抹金銀水罐一拂子二把翟轎  
一乘行障二葉坐障十葉

公侯百官儀從

洪武三年十二月詔定公侯儀從禮部尚書陶凱等  
考定以唐宋之制爲準於是賜功臣魏國公徐達  
以下儀從各有差

洪武十三年三月癸巳詔以京衛軍士充公侯儀仗  
戶韓國公李善長魏國公徐達皆二十戶曹國公  
李文忠等皆十九戶侯皆十五戶先是以京民充  
之近因善長以老疾辭儀從故命易以軍士仍給  
之

洪武十年八月壬申定官員儀從及公使人數初丞  
相大都督准侯例儀從用十五人從一品十三人



皇明典禮志 卷之十七  
正從二品九人三品七人四品五人五品四人六  
品七人七品三人八品九品二人至是議自從五  
品以上仍前例六品至九品比前例各減一人其  
各司聽差公使人數中書省御史臺各二十六人  
六部各十人斷事司察院各八人應天府十五人  
上元江寧二縣各十人

凡官員鞍轡馬領下纓并鞦轡俱黑色不得用紅  
纓及描金嵌金天青硃紅裝飾公侯及一品二品  
銀減鐵事件描銀靴三品至五品銀減鐵事件油  
畫靴六品至九品擺錫事件油畫靴一軍民用鐵

### 事件黑綠油靴

在朝公卿大臣乘安車肩輿景泰間在京文職官  
自三品以上乘肩輿正統後因太監汪直奏革部  
覆得旨如景泰時行弘治間河南等道監察御史  
奏禁約八人擡部議兩京及在外文武官員應乘  
轎者乘轎應乘馬者不得乘轎得旨八人轎嚴加  
禁約

凡官員傘蓋不得用金繡硃紅裝飾公侯及一品  
二品銀葫蘆頂黑色茶褐羅表青絹裏三簷雨傘  
油絹三品四品黑葫蘆頂餘同一品五品黑葫蘆



皇朝典制志 卷之十一  
頂青羅表青絹裏兩簷雨傘油絹六品至九品黑  
葫蘆頂青絹表青絹裏兩簷雨傘油紙軍民不得  
用羅絹涼傘止用油紙雨傘

成化元年令凡京官出外四品以上引導六人用錫  
槩鋼叉藤棍七品以上引導四人用錫槩藤棍在  
外方面官引導六人用錫槩鋼叉藤棍各府及監  
運四品以上官引導二人用錫槩藤棍七品以上  
引導二人用藤棍八品九品用竹篋二引導雜職  
不得引導若府州縣官催徵用竹篋杖巡捕用  
叉刀之類導引者不在禁限其京官還里不得引


導及責罰吏民若風憲官僭用許諸司指實具奏  
論曰昔人皇氏乘雲車駕六羽軒轅氏創五旗五  
麾以謹出入以嚴尊卑夏后氏之綏殷之太白周  
官隸僕掌蹕官中之事建大常大旂大赤太白太  
麾漢朝會則衛官陳車騎張旗志虎賁羽林弧弓  
撮矢陞戟左右戎頭偏脛陪前向後天子出車駕  
次第謂之鹵簿有大駕法駕小駕黃屋左纛鸞旗  
在前屬車在后或曰鹵者大盾也以大盾領一部  
之人故曰鹵簿或曰凡兵衛以甲盾居外爲捍蔽  
載在簿籍是鹵簿之名始於漢臣下無得而稱焉



皇明典禮志卷之十一  
唐朝會以三衛爲五仗。四品以上皆給鹵簿。是鹵簿儀仗。達於上下矣。宋大駕鹵簿。皇帝乘玉輅。駕青馬。每大祀。命大禮鹵簿使專掌定字圖。儀仗使糾督之。而以儀仗充庭之制。衛尉領左右。街司左右。金吾仗司。六軍儀仗司。主清道徼巡。排列奉引。儀仗。國初損益百代。嘗詔禮官鹵簿。彌文。務從省節。爲子孫法。而殿中制黃麾仗。凡正旦聖節朝會。及冊拜接見蕃臣。儀鸞司陳設儀仗。自至尊而逮皇后皇妃。東宮暨妃。皆得有鹵簿。有儀仗。親王而下。止稱儀仗。而群臣無及焉。

終。







古畧

著陳

廷

藏

書



